



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim tir_yimyim

tir yimyim TAPAK 7

Jan 5-6 anogotem nung US NSA, Sullivan-i India semdangtsü

Syria-i FM UAE, Qatar aser Jordan semdangtsü

VOL. XXII ISSUE NO. 81 (ADOK 81) DIMAPUR AMUNGNÜ (SUNDAY) AENJETI (JANUARY) 05, 2025 ₹ 5.00

Kohima nung kibur maliba azü khasetsü memelar

Dimapur, January 4, 2025 (TYO): Kohima district nung kibur maliba azütem khasetsü memelar ta Additional Deputy Commissioner Kohima Rhoisetho Nguori-i metetdaksüogo.

Telok kari Kohima District aser Kohima Municipal ward tem nung kibur maliba azütem khasetsü tetuyuba agütsüba osang lir. Ajisüaka iba ya Prevention of Cruelty to Animals Act, 1960 (PCA Act) aser Bharatiya Naya Sanhita (BNS) kübok memelar. Item ozüng

ajanga kibur maliba azütem dena shirurutem tepsetba noktanger aser ozüngi memelar. Anungji kija mesüra teloktemi iba mapa meinyaktsüla ta ADC Nguori-i ashi.

Kibur maliba azütem lira Municipal/Town Council Authorities mesüra village authorities/concerned Area Administrative Officers nem osang sangoktsütsüla. Bangdakpurtemi Chief Veterinary Office den yaritepa kibur maliba azütem anepalutsü ta paisa metetdaksü.

Manipur Governor-i security tensa asadang

Imphal, January 4, 2025 (Agencies): Honibarnü Manipur Governor Ajay Kumar Bhalla-ia police, CRPF, BSF, aser Assam Rifles ketdangsurtem den Raj Bhavan nung senden ka ayonga menogo.

Iba mapang Governor Bhalla-ia tensa osang metetpela aser Director General of Police (DGP) dang public kümzüka ayutsü atema mapatem inyaktüsü tetuyuba agütsüogo. Paisa Army aser paramilitary forces dang Manipur nung law and order tiptema ayutsü atema akokba tashi yaritepsü ayongzük.

Iba senden nung Security Advisor to the Manipur government Kuldip Singh, DGP Rajiv Singh, IGAR (South) Maj Gen Ravroop Singh, aser CRPF o BSF ketdangsurtem aden.

Bhalla-ia tawa tu Manipur nung 19 buba Governor inyaktüsü tezüngzüktep agiba sülen state nung security akangshitsü atema mezüngbuba mera ka agiogo.

Kangpokpi district nung nisung telok kati Superintendent of Police yirutsüba sülen Manipur police-i security akangshiogo.

Kuki teloktemi Saibol yimtsüng nungi central armed forces agientsü akhangba ama meinyakba atema tejashi nung parnoki Kangpokpi SP office amak ta ketdangsurtemi ashi.

January 3 nikongdang nisung telok kati Superintendent of Police M Prabhakar indang office amak. Idangji SP office compound nung anena aliba garitem raksatsü aser SP Prabhakar yiru.

Northeast asoshi SBM-U sen 19% dang agütsü

| S. No. | States | Fund allocation | Fund released |
|--------|-------------------|-----------------|---------------|
| 1 | Arunachal Pradesh | 129.00 | 28.73 |
| 2 | Assam | 503.50 | 82.02 |
| 3 | Manipur | 96.20 | 14.79 |
| 4 | Meghalaya | 67.30 | 16.79 |
| 5 | Mizoram | 82.50 | 19.93 |
| 6 | Nagaland | 158.88 | 40.17 |
| 7 | Sikkim | 19.40 | 4.03 |
| 8 | Tripura | 85.30 | 15.34 |

Guwahati, January 4, 2025 (Agencies): Swachh Bharat Mission-Urban (SBM-U) 2.0 kübok North Eastern Region (NER) asoshi Rs. 1142.08 crore lezmükja lir ta Parliament Winter Session nung Minister of State for Housing and Urban Affairs, Tokhan Sahu-i ashi.

Ajisüaka, 2021 nungi SBM-U 2.0 atema Rs. 221.81 crore dang agütsüogo aser ibaji sen lezmükja aliba nungi 19% dang lir.

Iba osang ajanga North Eastern Region (NER) nung SBM-U 2.0 atema sen peria magütsüba aser mapa shitak inyaka moutetba sayur.

Congress MP Pradyut Bordoloi-i Parliament nung NER state tem asoshi SBM-U 2.0

kübok senotsü lezmüktsüba den iba mapa inyaka aruba osang tejangia asüngdang.

Assam nung iba mission kanga meilungi inyakba atema Bordoloi-isa kuli meshia liasü.

Bordoloi-isa Centre sorkar dang Northeast nung solid waste anepaluba indang asüngdang.

Iba asoshi Minister Sahu-i telangzüba agütsüdang NER atema Rs. 1142.08 crore lezmüktsüba nungi Rs. 221.81 crore agütsüogo ta ashi.

2021 nungi SBM-U 2.0 kübok North East nem sen shitak magütsüba atema temulung masür, Mapang shitak nung sen magütsüba ajanga iba mission takok ngua meinyakteter ta Bordoloi-i ashi.

Centre-i Naga yimten ka dang latettsü mulunga lir: Y. Patton



January 4, 2025 nü Kohima village nung Lhisemia Kethinuokelie 175 buba benjungmong nung Deputy Chief Minister Y Patton aser tangartem külemi agiba noksa ka angur.

Kohima, January 4, 2025 (TYO): Centre-i Naga Political Issue (NPI) atema telatetba ka dang agütsünür anungji teti atema yimten latettsü asoshi Naga telungpur teloktem aser nübortem longjemtsüla ta Deputy Chief Minister Y Patton-i ashi.

Lhisemia Kethinuokelie 175 buba benjungmong nung jembidang Y. Patton-i iba osang metetdaksü.

Lhisemia Kethinuokelie ya Kohima village nung Lhisemia Khel (sector) nung kidong balala temeyoktep tentet ka lir.

"Naga telungpur teloktem longjemra Prime Minister Narendra Modi lenisüba kübok Government of India (GoI)-i yimten latettsü renema dang lir" ta pai ashi.

"Naga telungpur telok 28 shi ka lir aser parnok ajaki Naga yimten latettsü atema noktaker ta ashir. Ajisüaka telok ajakibo Centre den olemtep nung dena mali saka tashiyim agi sen saruba aser ozüng alema tax saruba amala lokti anema mapatem ang inyaker" ta Patton-i ashi.

"Asen yimtenren mapa raksaba atema temulung züreper aser telok 28 shi kati sorkartem ketdangsur. Ozüng alema tax

saruba aser tashiyim agi sen meshiba ajanga Naga nungeri terenlok mapa inyaka mouteter" ta paisa shisem.

"India sorkar den yimten latettsü atema inyakba Naga telungpur teloktem anema noktaker masü saka telok aika tashiyim agi sen meshiba mesüra pei nija ajangzüksü atema dang inyaker" ta Deputy CM-isa ashi.

Iba ama tensa ka nung Naga nung tejakleni moutettsü. Naga loktiliba ajanga raksaa lir aser lemsaogo. Asen state tejakleni aotsü atema tashitait loktiliba ka nungdaker, ta pai ashi.

"Chief Minister Neiphiu Rio lenisüba kübok state sorkar nung opposition mali aser MLA 60 prong sabang ka nung noktaka lir. Iba ya Naga loktiliba longjemdaksütsü tangatetba nung aser ano teti atema Naga yimten lateta ayutsü atema lir" ta Y Patton-isa ashi.

"Asenok anemertemi opposition maliba sorkar dak tai tongloktsüba manentsü saka iba ya nükjidong tajungtem aser ajak ajungtsü atema akümba lir" ta pai nenshia ashi.

India sorkari Naga telungpur telok shia atema masü saka Naga

nung ajak asoshi yimten latettsü mulunga lir. Anungji Naga telungpur telok ajak ka küma longjemtsüla aser teti atema Naga yimten lateta ayutsü ayongzükter, ta Patton-isa metetdaksü.

"Iba sentong nung yimtsüng 25 nungi nübortem aser Naga kin balala aden aser talisa alemli nungi L. Khel den tesentaktep alirtem adener anungji iba benjung ya 'Naga gathering' ka lir" ta pai ashi.

Nagaland state renloktsü aser tejakleni aotsü atema kin, kidong mesüra tesem telemsa kecha melii Naga loktiliba nung yimjung aser telongjem adoktsü atema osang prokshitsü mepishir, ta Deputy CM-isa ashi.

Y Patton-isa sentong temer osangbener den jembidang Hombarnü state cabinet senden ka amentsü aser idangji Naga telungpur teloktem den senden amenba osang lemsatepsü ta ashi.

Iba sentong nung School Education and SCERT Advisor Dr. Kekhrielhoulie Yhome, taoba Chief Minister aser L Khel senior citizen Dr Shurhozelie Liezietsu aser Kohima Village Council chairman Helievi-o Solo nungeria o jembi.

BJP ajanga Manipur timtemdaksür: Mallikarjun Kharge

Imphal, January 4, 2025 (Agencies): Prime Minister Narendra Modi aser BJP ajanga Manipur tensa mesüngjemteter ta Congress President Mallikarjun Kharge-i tai tongloktsüogo.

"BJP-i Manipur tensa raksatsü. BJP-i tensa mazüoktet aser tajangzük angutsü merangba ajanga tamajungba kümdaksü" ta Kharge-i "X" nung metetdaksü.

Prime Minister Modi-i Manipur tesüsabuba semdangbaji January 2022 nung election nüboyimba atema liasü. May 3, 2023 nungi mepetmesü adoka tensa raksaka Modi-i Manipur khen danga mesemdang. Iba mepetmesü nung nisung 250 tema taküm samaogo, 60,000

tashi talidak maka kümogo aser yimtsüng aika samatsüogo, ta Kharge-isa ashi.

"Chief Minister N. Biren Singh lenisüba kübok BJP-i aniba sorkari tensa mazüoktet. Chief Minister-i tensa atema sasaa bilemba lemsatepogo saka iba jagi mepirir aser talisa Prime Minister-i mapa kecha meinyaker" ta paisa metetdaksü.

"Kangpokpi district nung nisung telok kati Superintendent of Police indang office amak aser pa yirutsüba den police gari aika rongdoktsü. Telungpurtem prangpong bener senzüba ajanga tensa tamajung akümba osang angazükter" ta Kharge-isa ashi.

December 6 nü opposition

INDIA bloc-i Prime Minister dang 2024 küm matemdangsa Manipur semdangtsü takhangba agütsüogo. Onoki PM Modi dang Delhi nung political party ajak nungi nisungtem dena senden ka ayonga amentsü aser mepetmesü angatettepsü atema pai (Modi) mapa inyaktüsü takhangba agütsüogo ta Congress President-isa nenshia ashi.

BJP-i temzüng nung lateta aliba mapatem meinyakteter. Tensa azüoka aser süngjema ayutsüba sorkar ka tebilemstü khuret lir ta Supreme Court-ia shiogo anungji tekaratiba nung Manipur nung alirtem timtemba ya agientsüla ta Kharge-isa metetdaksüogo.

NITI Dimapur-i ayongzüka Career Guidance sensaksem aka



Dimapur, Aenjeti/January 4 (TYO): Medical aser engineering career dak sendakba nung Career Guidance sensaksem ka NITI Dimapur-i ayongzüka institute indang auditorium nung Honibarnü agiogo.

Iba sensaksem nung shisalen sayurji Delhi Technological University nungi B.Tech graduate Er. Rishav Sethi liasü, shiba Nagaland kübok school, college lokti tentet balala yongtsü nung kanga nungtugu ojembir ka kumogo.

Er. Sethi, shiba azü tenlarthem atema mobile applications yangluba atema ajaki jangja lir, pai pa tajangshibatem lemsatep aser kaketshirtem dang nukjidong tejangja ayutsü, mapang kanga junga achayangba tasa angazüka benshitsu aser NEET aser JEE amala national competitive tatidangtem nung temaba jenjang tongtettsü ajungshia liasü.

Paisa, tatidang mezüngbuba agütsüba mapang takokba tashi tajungtiba agütsütsü koda tongtibang iba indang lemsatep,

kechiyog mezüng merandangba mapang takok anguba ajanga tesülen sasaba nungi jembodaktsür, ta ashi.

Ojembiba mapang Er. Sethi-isa, national-level tatidangtem nung takok angutsü atema jenjang ka nungi ka ta koda renemtsü iba indang metetdaktsü. Paisa, financial planning, stress management, aser lesson bushitsu atema mapanglem tajung sülen anidaktsü koda tongtibang iba indang lemsatep.

Paisa, sorkar college balala atema kaketshir lakh aika menden ishika atema tokteper, ajisüaka Nagaland nungi kaketshirtemi item tatidangtem atema nendaka renema Scheduled Tribe tajangzük agitettsü, ta ashi.

NITI Dimapur-i kaketshirtem nem tajangzük balala agütsüba indang jembiba mapang Er. Sethi-i, Class IX nungi XII kaketshirtem atema kümshia coaching agütsüba aser repeater tem asoshi crash course agütsüba amala institution sentongtem asoshi tenüngsang agütsü.

Paisa, institute nung qualified faculty tem aliba indanga shisem, shirnok timba IIT alumni tem lir, aser parnok yagi IIT-JEE aser AIIMS amala tatidangtem ajangtettsü atema tetsükdaktsü kechisa ajurur item indang tajangshibatem jangja lir.

Sentong nung NITI Director Ajay Sethi-i sentong nung shilem agirtem pelashishia agizük aser institute küm 25 tashi education luyim nung takok nung aruba indang lemsatep. Paisa, NITI pur Nagaland nung school aser college 25 den longjemer inyakdar aser iba ajanga state nung iba institute ya jenjang aketba education agütsütsü asoshi kanga tongtibang kumogo, ta ashi.

Iba Career Guidance sensaksem sentong ya Lomika Chishi lenisüba nung agi aser tepela o Anshika Sethi-i jembiba liasü. Sentong nung school trok nungi kaketshirtem aser parnok tsürapurtemi shilem agia liasü, ta NITI Nagaland MD Ajay Sethi-i sangdong ka ajanga metetdaktsü.

AR-i ayongzüka International Mind-Body Wellness Day mungogo

Dimapur, Aenjeti/January 4 (TYO): Assam Rifles-i ayongzüka January 4 nü Chizami jila nung International Mind-Body Wellness Day mungogo.

Health aser discipline sobaliba jenjang ajungkettsü nukjidong nung Assam Rifles-i International Mind-Body Wellness Day amungba anogo Yoga Workshop ka aser Healthy Living Practices dak sendakba nung sensaksem sentong ka Chizami jila nung ayongzükogo, kong nisung 47-i shilem agia liasü.

Iba sentong ayongzüka agiba ajanga nukjidong agi anidaktsüba taküm ka akümtsü atema shitemang aser tekelok shisatsü liomedema renloka aotsü koda tongtibang iba indang metetdaktsür.

Yoga workshop ayongzüka agiba nukjidongji sentong nung shilem agirtem nem yoga ajanga tajangzük agütsüba indang tangazükba agütsütsü liasü, koba physical endurance aser flexibility tajungba kümdaktsütsü aser

tekelok shisatsü süngjemshia tebilembadanga tejangjaba kümdaktsütsüba dak rangloker agia liasü.

Lecture agütsüba mapang inyakyim shitak lateta aliba taküm libaliro, temang arakzua inyaksangshia alitsüba, balanced diet aser meditation amala inyakyimtem benoka inyakangshitsü kodang tongtibang iba indang lemsatepa liasü.

Nisung ka yimayimpong yangerba, teamwork aser tanen makai meranga raratsü atema tanüla züsenba nung saisapongi koda tongtibang shilem agir iba dak rangloker tangazükba agütsü. Saisapong yagi, nendaka tanen makai inyaktsüba, discipline, aser rasa-a bilemstü atema tangazükba agütsür.

Assam Rifles-i iba sentong ayongzüka agiba ajanga, tekelok shisatsü aser anema aliba temang kaji saisapong nung dang masü saka taküm nung wadang ajak nung takok asoshi kanga tongtibang lir ta nenshir.

Assam nung sen crore 2 alang cough syrup apu



Guwahati, Aenjeti/January 4 (Agencies): Tenokdangba agütsürba aliba cough syrup bottles aika Hokolbar aonung Assam kübok Cachar tesem nung puogo.

Itangitertemi osang tejangja ka agütsüba dak ajemdaker Cachar Police team kati Cachar kübok Damcherra tesem nung truck ka sota liasü.

Iba temulung meleme bilemba gari ya sashia bushisüngdangba sülen codeine aketba cough syrup koba Assam aser linük kübok tesem balala nung tenokdangba agütsür lir, item cough syrup bottle 11,100 nguteta liasü.

Chief Minister Himanta Biswa Sarma-i sangdong ka ajanga ashiba agi, sepaitemi apuba cough syrup tem ya sen crore 2 alang liasü.

Ajisüaka iba ken o nung aibelena alirtem apuba indang osangbo kecha magütsü.

Temetetsü kaji, item cough syrup tem ya mashiyimi amshia addict akümtsü ana nung aliba ajanga Assam nung item cough syrup tem tenokdangba agütsür lir. Kümtem tsüngda Assam police state kübok tesem balala nung Codeine keta aliba cough syrup tem ya aika puogo.

Tenokdangba agütsür aliba ajanga item temesepba mozütem ya ozüng alema shishilembaba tali akümba den tamshira timba kumogo.

Syrup ya tamshiyim shitak agi mamshira tali amshia addict akümtsü ana nung lir asünung tenokdangba ya agütsür lir.

Codeine ya opioid ka lir aser iba ya tali amshira addict akümtsü.

Mizoram sorkari refugees 43,000 dak tema nem angati jang agütsü



Aizawl, Aenjeti/January 4 (Agencies): Mizoram sorkari Myanmar aser Bangladesh nungi state-i arua aliba refugee tem aser Manipur nungi jena arur Aizawl district dak alaka district balala nung jenoka alirtem nem angati jang lemsüba sentong tembangogo, ta ketdangsurtemi metetdaktsü.

Mizoram kübok Myanmar den arrtsü nung aliba Champhai district nung district administration-i refugee 14,390 nem jang quintals 4,533 lemsüogo. Iba district nung Myanmar nungi refugee aika jenoka lir.

Champhai deputy commissioner VL Remliana-i ashiba agi, district nung tang Myanmar nungi refugee 13,986 aser Manipur nungi nisung 404 jenoka lir.

Lawngtlai district koba Myanmar aser Bangladesh na den arrtsü nung lir, iba district administration-ia district nung

jenoka aliba refugee 8,020 nem jang lemsüogo, ta ketdangsurtemi metetdaktsü.

Myanmar nunger refugee 5,922 aser Bangladesh nungi refugee 2,014 nem jang quintals 2,526 lemsüogo, ta parnoki ashi.

Lawngtlai deputy commissioner Cheemala Siva Gopal Reddy-i, refugee tem nem angati jang lemsüba sentong ya taoba küm November 11 nü tenzükja liasü.

South Mizoram kübok Siaha district nung Myanmar nunger refugee 5,953 nem jang quintals 1,875 lemsüogo.

District deputy commissioner V.L. Hruaizela-i ashiba agi, jang alemba sentong ya November 20 nü tenzük aser district nung refugee tem ya Myanmar nungi dang lir.

Khawzawl district, kong refugee tem tejemba lir, iba district nunga Myanmar nungi refugee 128 aser Manipur nungi

arua jenoka alir parnok 19 nem jang quintals 46 lemsüogo.

Aizawl district administration-ia jang lemsü tenzükogo aser tang tashi metembang lir.

Union Ministry of Home Affairs (MHA)-i, refugee aser Manipur nungi arua jenoka alirtem nem angati jang agütsütsü atema sen crore 5 agüja liasü.

Iba sen amshia Ministry of Consumer Affairs, Food and Public Distribution dang nungi jang metric ton 1,379 alia liasü.

Jang lemsütsü atema Mizoram sorkari MHA nem agütsüba data nung refugee aser Manipur nungi nisung 43,788 state nung jenoka lir ta metetdakja liasü.

Item nisungtem rongnung parnok 33,764 Myanmar nungi, Manipur nungi 8,010 aser Bangladesh nungi 2,014 lir.

Refugee ajak nem jang seret 31.5 agütsüogo.



January 04, 2025 nü New Delhi nung Grameen Bharat Mahotsav 2025 semzükba sülen Ato kilonser, Narendra Modi-i stalls semdanga senzüdang tangokba noksa nung angur. Kasa noksa nung Union Finance Minister, Nirmala Sitharaman-a angur.

India aser Maldives nati tesendaktep tashi itshitsü bangjem

New Delhi, Aenjeti/January 04 (Agencies): India foreign minister S Jaishankar aser Maldives Foreign Minister Abdulla Khaleel na senden amenba mapang nung India aser Maldives nati linük ana tsüingda tesendaktep tashi itshitsü atema bangjem.

Linük anatisa India-i teyari agüja Maldives nung project aika inyaktsü atema tezüngzüktep ka agia sign sütepogo, ta ketdangsertemi metetdaksü.

Abdulla Khaleel-i, nüngdakba mapang nung India-i senotsü agi Maldives yariba

atema India dang pelaba ash. lemsatop.

India sorkari, "Foreign minister Khaleel-i, Tir Muizzu aser Maldives sorkari India-Maldives Comprehensive Economic and Maritime Security Partnership kübok külem nükjidongtem ataloktsü atema India sorkar den külemi inyaktsü ta shiogo, ta lemsatop" ta metetdaksü.

Jaishankar-i, Maldives den tesendaktep ayutsüji kanga tongtibang aser India-i maneni 'Neighbourhood First' policy aser Vision SAGAR kübok Maldives nungita yaritsü, ta

Khaleel-i semdangba mapang nung linük anati Phase III kübok High Impact Community Development Projects inyaktsü atema tezüngzüktep ka agi.

India sorkari, "Tang ketdangseri semdangba ya linük ana tsüingda amalitepa inyakba den sendaktepa lir. Iba ya ajanga linük anaprongla aser Indian Ocean Region nung ajak tajangzük angutsü atema tesendaktep ano tajungba akümtsü asoshi maongka angutsü," ta metetdaksü.

Delhi assembly election atema BJP-i candidate 29 sangdongogo

New Delhi, Aenjeti/January 04 (Agencies): Taruba ita Delhi nung assembly election agitsü lia Honibarnü BJP-i candidates 29 tenüing sangdongogo.

Taoba mapang MP, Parvesh Verma-i New Delhi assembly menden nung AAP tongti lenir, Arvind Kejriwal den tokteptsü aser taoba mapang MP, Ramesh Bidhuri-i Kalkaji menden nung Chief Minister aser AAP candidate, Atishi den tokteptsü.

2013 küm nungi tenzükä New Delhi assembly menden nung Arvind Kejriwal-i dang takok ngua arudar.

Taruba election nung New Delhi menden nung Kejriwal-i taoba mapang chief minister ana jabasotem den tokteptsü. New Delhi menden nung BJP nungi taoba mapang West Delhi nung MP, Verma aser Congress nungi taoba mapang Delhi Chief Minister, Sheila Dikshit'er jabaso,

Sandeep Dikshit nati Arvind Kejriwal den tokteptsü.

BJP indang mezüngbuba candidates list nung tawa Congress aser AAP toktsür BJP nung adener lenir 8 densema lir.

Taoba mapang Delhi Congress Tir aser tang BJP nung alisang, Arvinder Singh Lovely-i east Delhi kübok Gandhi Nagar menden nungi tokteptsü.

Jangpura nungi taoba mapang Congress MLA asemen inyaktsang, Tarvinder Singh Marwah-i 2022 küm BJP nung dena liasü aser taruba election nung pai kasa menden nungi tokteptsü.

Iba menden nung pai AAP lenir aser taoba mapang Delhi deputy chief minister Manish Sisodia den tokteptsü.

BJP-i Bijwasan menden atema taoba mapang transport minister Kailash Gahlot shimogo. November ita nung pai AAP

toktsür BJP nung dena liasü.

Minister menden nungi anenba sülen AAP toktsüsang, Raaj Kumar Anand-i Patel Nagar menden nungi tokteptsü aser AAP toktsür BJP nung adensang Kartar Singh-i kasa menden nungi tokteptsü.

Ano taoba mapang AAP MLA, ND Sharma-i Badarpur menden nungi tokteptsü.

BJP-i national office-bearers- Dushyant Kumar Gautam aser Ashish Sood na Karol Bagh aser Janakpuri menden nung toktepdaksütsü.

BJP national secretary Manjinder Singh Sirsa-i Rajouri Garden menden nungi tokteptsü. 2015 küm election nung pai iba menden nung takok ngua liasü.

Taoba mapang Congress councillor, Kumari Rinku-i Seemapuri menden nungi tokteptsü.



January 04, 2025 nü Patna nung Jan Suraaj party tongti, Prashant Kishor den tangartemi lumia longkak aيتدang tangokba noksa nung angur. Kaketshirtemi 70buba Integrated Combined Competitive (Preliminary) Examination (CCE) tatidang agishitsü akhanger.

Jan 5-6 anogotem nung US NSA, Sullivan-i India semdangtsü

Washington, January 04 (Agencies): US national security adviser (NSA), Jake Sullivan-i January 5-6 anogotem nung India semdangtsü aser iba mapang nungji pai India NSA, Ajit K Doval den tongti ketdangsertem ajurua senden amentsü.

Sullivan-i India nung tongti ketdangsertem den linük ana tsüingda tesendaktep, region aser international ontüktem nung o lemteptsü aser tang teinyakdak maparen kar renemtsü atema o lemteptsü, ta White House-i metetdaksü.

Arrshi küm 48, Sullivan ya US nung national security adviser (NSA) inyaka arurtem rongnung tanubotising lir. 2021 küm January 30 nü Tir, Joe Biden-i pa NSA shima liasü.

Sullivan kobi melii NSA menden nungi anisüngzüktsü lia pai India semdangba mapang nung IIT, New Delhi nunga o jembitsü.

January 20 nü Congressman,

Michael Waltz-i pa melentsü. Sullivan-i National Security Advisor Ajit Doval den linük ana tsüingda lenla balala nung tesendaktep onüktem nung o lemteptsü, talisa technology tsütsü amalitepa inyakba atema jembitsü, ta US ketdangser kati metetdaksü.

"National security advisor ana senden amenba mapang nung tesüiba küm pezü tsüingda linük anati inyakteta arubatem asadangtsü, aser tang teinyakdak maparen kar renemtsü atema jembitsü. Iba dak alia taruba team tasen atema maongka tasen kar jangjatsü merangtsü," ta ketdangserisa metetdaksü.

Sullivan-i India semdangba mapang nung external affairs minister, S Jaishankar-a ajurutsü. Sullivan den sorkar department balala nungi ketdangsertema arutsü.

"Onoki India nung business lenirtem aser lanur entrepreneurs-a ajurutsü," ta ketdangseri metetdaksü.



January 04, 2025 nü New Delhi nung Punjab nungi tetsürtemi taoba mapang Delhi Chief Minister aser AAP national convener, Arvind Kejriwal'er kima longkak aitba noksa nung angur.

FORM NO. 14
[See Regulation 33(2)]

**OFFICE OF THE RECOVERY OFFICER- III
DEBTS RECOVERY TRIBUNAL, GUWAHATI**
Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

DEMAND NOTICE
Notice Under Sections 25 to 28 of the Recovery of Debts & Bankruptcy Act, 1993 and Rule 2 of Second Schedule to the Income Tax Act, 1961.

**RC/163/2021
BANK OF BARODA
-Versus-
LONDONLIU PAMEI**

To,
(CD 1) LONDONLIU PAMEI
Daughter of Late G Pamei, House No. 45, K Sachu Colony, Dimapur Dist., Nagaland State, Dimapur, Nagaland- 797112.
(CD 2) MRS. ALUGANG PAMEI
Wife of Aglesh Prasad, House No. 51, K Sachu Colony, Dimapur Dist., Nagaland State, Dimapur, Nagaland- 797112.
(CD 3) MR. AGLESH PRASAD
Son of Late Kanhaiya Prasad, House No. 51, K Sachu Colony, Dimapur Dist., Nagaland State- 797112.

OA/77/2020 nung ajemdaker DEBTS RECOVERY TRIBUNAL, GUWAHATI nung Presiding Officer tetuyuba nung Recovery Certificate nung aliba ama Rs. 74,59,060.00 (Rupees Seventy Four Lakhs Fifty Nine Thousands Sixty Only) den pendentelette aser 25.02.2020 anogo nungi sentshüh mouma tashi küm shia future interest @ 9.75 % Simple Interest Yearly aser costs Rs. 1,30,110/- (Rupees One Lakh Thirty Thousands One Hundred Ten Only) na (Jointly and Severally/ Fully/ Limited) anema lir ta metetdaksür.

| | |
|---|-------------------------|
| (1) Recovery Certificate nung aliba sentshüh: | Rs. 74,59,060.00 |
| (2) 25.02.2020 nungi 01.11.2021 tashi interests @ 9.75% | Rs. 12,25,380.51 |
| (3) Costs | Rs. 1,30,110.00 |
| TOTAL | Rs. 88,14,550.51 |

2. Nü dang iba sangdong agütsüba mapang nungi tenzükä anogo 15 tsüingda temalen shia aliba sentshüh agujang ta tuyur, mesüra Recovery of Debts Due to Banks & Financial Institutions Act, 1993 aser Rules nung ajemdaker sentshüh alangzüktsü atema inyaktsü.

3. Nü dang taruba ken o mangadangsa affidavit ka nung nü kiojen sangdongang ta tuyur.

4. Nü dang maneni ken o angadangtsü atema 27.02.2025 anogo nung anepdang 10:30 ako tashi nung tsunglanglen sign süa alir matsungdangi arung ta tuyur.

5. Iba dak alia nai tsunglanglen shia aliba senotsü-a agütsütsüsa akümtsü:

(a) Iba certificate /execution proceedings indang notice agütsüba mapang nungisa item ama interests.

(b) Iba notice aser warrants agütsüding teindokba sen ajak aser sentshüh alangzüktsü atema inyakshangshidang indokba sen ajak.

Tsünglanglen kü meyongnem den iba Tribunal indang seal, iba anogo nung agütsür: 13.12.2024

**RECOVERY OFFICER
DEBTS RECOVERY TRIBUNAL GUWAHATI**



TIR YIMYIM YIMOBILEM (EDITORIAL)

DIMAPUR AMUNGNÜ, JANUARY (AENJETI) 05, 2025

Ni ayatai !

Tanübo asenok ajak tia junga Khristan kumogo. Ibayongji, asenok tzü nung baptir aser arogo nung zungsem akümer. Aji oda, arogo nung ka ama sentepi aoer aser arogo mapa nung akok tashi yariteper. Iba jagi asenoki asenok ya Tsüngrem tsüngdang meshiteta lir ama bilemer. Iba amaji Isaia ainkeria pai pa nuk agi Kibuba sentsüwangshii mangu tashi temeshi nisunga ta bilema shina sayutsüngiba asenoki Isaia tapu 5 tashi nung angur. Ajsüaka, Isaia tapu 6 nung, kodang pai Kibuba sentsüwangshi angu, idangjiang pai pasasa pa temenen reprangtet. Isaia ama ainker ka, shibai tarutsü anogotem nung Kibubai inyaktsüba mapatem shin, iba ainker jagi Tsüngrem sentsüwangshi ajuruba mapang, " ni temenen nisung, ni ayatai, ni makaka' ta ashitsüsaba tiaji asenoki angudang, jet ta asen taküm aser asen tamang jenjang asenoksasa Isaia ainker denji medemdanga asadangsü nungdaker. Asenok ajak arogo nung aser pei pei yaribo Tsüngrem tenzükba mapa nung shilem agir asünungji, asenoki asensasa temeshi ama bilema tangar temenen asoshi dang bilema alitsüa akok. Iba amajisa Isaia ainker dak atalokba ama, asenoki asen nuk agi Tsüngrem sentsüwangshi mangu tashi asensasabo asen dak aliba tai temenen mereprangtettsü. Komaka asenoki Tsüngrem uluba aser Pa sentsüwangshi indang ilaa bilemer, patetkaji asenoki asen dak aliba temenentem indang kecha süokia ia mebilemtsü. Isaia ainker taküm nunga temelenshijibo Pai Tsüngrem sentsüwangshi pa nuk agi anguba sülen dang aru. Iba kasaji asenoki Tsüngrembo külemer aser tamanga amanger saka asenoki asenoksasa Pa sentsüwangshiji mengutettsüsa ali tashibo asenok taküm yimya aser libaliro memelenshitettsü. Ainker kati ni temenen nisung, kü temeli memerük ta ashiba tetezüji, pa temulungjang memerük, anungji pai shinba mapatemji Tsüngrem tsüngdang tagizüktettsüla masüa ta ashir ta asenoki angatetter. Laishiba nung Yisui Mathi 12 nung, kechisa tebang nungi adoker aji temulungjang nungi adoker, anungji tebanglen nungi aiba agi masü saka temulungjang nungi adokba agi nisung ka menentsür ta ashiba asenoki angur. Ibaji mangatet ama, asenoki teti tebang temeli majungyonga temulungjangbo junga lirgo ta jembir. Iba tangatetba jagi, asenok ama kasa temeli memerükba temenenpurtem den kecha tebandang maka asenok alir aser amangteper. Asenok taküm nung aser asenok kidang aser asenok sentepdak tenla kidang tanüla temeshi tatenba mali, asenok sarasadem aser sayutsüngiba takong aser jangratema kentena tsüngsangba mali, shinbabo anen ta tenung agidang asenok amangba aser arogo taküm alibaji asenok tamang tenük agi Tsüngrem sentsüwangshi mangu aser matongba ajanga lir. Kodang asenoki Tsüngrem sentsüwangshiji ngudir, Tsüngrem ashi angatsübaji kecha nungnanga malitsü. Tsüngrem tenzüksü asoshi kecha mashishitsü. Kasa Tsüngremi ashi angaba lenir aser ainker asüyonga Mosa aser Yerimia nungertemibo atsüayong aser Tsüngrem dang kuli meshi. Ajsüaka, Isaiabo yamaji masü, Tsüngremi tenya metenyaka, pai pasasa Tsüngremi kechi atema koloni yokner pa aotsü ta mulungtet. Tsüngrem tashi angatetba aser Pa sentsüwangshi anguba aser manguba na tetsüngda talangka lir. Tanü asenok rongnunga Tsüngrem tashi aser sentsüwangshi mangatet aser mangu ser amanger aser tenzükera aika lir. Item jagi tangar jungjunga amangertem aser teindang taküm aser kibongtem menütsür. Item jagi kasa temeli memerükba nisungtem ama tiaka dang amangyonga aser tenzükuyonga shitak dang ta bilemer. Ibayongji, tamanger o mamanger na aser tenzükera o metenzükera na tsüngda kecha balaka tetsüngda mereprangtetter. Iba amaji, asenok Tsüngrem dak amangertem aser Tsüngrem tenzükertem taküm aser kibong libaliro nung tangar den kecha tebandang maka temulungjang memerük aser temeli mazüok lira, asenokia Isaia ainker Tsüngrem tsüngdang pa mulung ajak tokzüka agütsüba ama, asenokia' ni temenen nisung, ni ayatai, kü dang aochiang' ta Tsüngrem dang bendanga agüja shitettsüla. Idangji dang, Tsüngremi asenok nem asenoki inyaktsüba mapa aser tashi agütsütsü.

OLEMSABANG

Kibong nung Amendakba Arogo ka Yangludi (Towards a Family-based Church)

~ Tiatoshi Longkumer, Kohima

(Maneni yashi adok nungi...)

10 Foundational Truths of Family Discipleship:

Urban Indian Mission (UIM) tenzüksang Rev. Dr.P.C. Matthew-i Kibong nung nütsüngsüba inyaktsü asoshi ochi tongshilong 10 mamatoki benschitsü yamai ashir.

1. Kibong ajanga Pa yimli sangdongtsü aser alima moatsütsü Tsüngremer nukla lir (Family is God's framework of spreading His Kingdom and Blessing the world).
2. Kibokji Tsüngremi meshiteta ayuba tesem kong nütsüngtem arogo yangertsü atema yanglur (Home is the God-ordained space where disciples are made for building his church).
3. Kibok taküm yimya balala atema Tsüngremi jangja-jangja tetuyuba agüjaa lir (God intentionally has given specific instructions for various aspects of home life).
4. Kibokji tashi, tesendaktep, aser anasatepba alitsü tesem tajungtiba lir kong nütsüng tajung yanglur (Home is the best environment that combines authority, proximity, relationships and moments for disciple making)
5. Tamanger tsürapurtemji tanurtem asoshi Tsüngremi shimtetba tongtipangtiba nütsüngsürtem lir (The believing parent is the God-appointed primary disciple-maker of their children).
6. Kibong shiaji Khrista ngudaktsüba arogo tilala ka-ka asütsü ajaba lir (Every family unit is called to be a small church reflecting Christ to one another).
7. Arogo aser kibong nung temelenshiji meimchir mapa masü saka tanela temeshi mapa ta angatettsüla (Transformation in Church and family needs to be pursued as a work of the Spirit and not mere human effort).
8. Putu ka danga nütsüngsüba mapa meinyaki toktsübaji ajanga arogo luladaktsür aser Tsüngrem yimli yangerlokba menudaktsür (Missing out to disciple even one generation can shrink the church and effect God's kingdom expansion).
9. Arogo tenzükera kibongji kibong nütsüngsüba mapa atema tatishitsü kibong asütsüla (The church leader's family is to be model for family discipleship).
10. Tsüngremi tamanger kibong shiaji mission inyakba kibong ka asütsü aja aser iba jagi kasem missionji sayur (God calls every believing home to be a missional home as they model the triune missional God).

Kibong nung Tsüngremer Nütsüng tajung aintsü atema komala merasa agitsü?

1. Arogo nung temeshi kiyimba khulizung agirtem atema "pre-marital counselling" tajung mapang peria agia sayutsüla. Arogo kar nung tang ya counselling session asem mesüra pezü agir. Saka nungdakra iba dang nungi teimba agi nunga tajungba dang. Kechiaser anogo ishika satitsü mapang meindoknudang, kibong kum ishika tsüngda nung raksabaji ang tesasatsü tuluba. Ano arogo ajangasa kibong mekumakasa kodang parnok arogo bushia arudir, sannükera post-marital counselling tajung agütsütsüla. Kechiaser arogo nung kibong ajakji kesa dang tongtipang lir.
2. Kibok tekülem agitsü sayutsü aser ajungshitsüla. Kibok tekülemji temeshi sabang tajungtiba lir. Nütsüngsübaji tenlakidang masü saka kilong nung tenzükera. Iba tatishitsü ya asenoki 2 Timoti 1: 5 aser 3: 14 – 15 nung Timoti taküm ajanga angur. Aji oda, kibok tekülemji artsütepba sabang masü saka Tsüngrem O, tanela ken aser sarasadem ajanga ajungshitepba mapang lir.
3. Kibong rangben longjemer tekülem sentep nung shilem agitsü maangka lapoktsütsüla, aser arogo tenyaba wadanga külemi inyaktsü nungloktsütsüla. Kibong nung tanela ren liromedema aintsü kanga tongtipang lir. Aser iba nukla nung arogo kibong rangben tanelaren mapa inyaktsüla.
4. Mapang shia Family aser Couple seminar alitsüla. Asenoki experience dak dang temulung lemer alir dang ashi, alima nung kibong indang tesayuba tajung agütsütsürtem jenti lir. Itemji mapang shia anir arua asenok sayudaktsütsüla. Aser arogo nungia iba amala training tajung agidakjaa asen tesayur kümdaktsütsüla.
5. Father school graduates aser Men/Woman's Special camp follow-up sentongtem kibong külemi mapang shia akatsüla. Camp nung adener dang ajungshiteper, külemi alir tanungbatemjibo toktsüra iba jagi aiben ano mezung yimya tu agisa meyiptsüsa akümer. Anungji mapang ajak nung kibong rangben follow-up agütsütsü tongtipang akümer.

Otem:

Kibong ka yangertsüba ya meimchiri puratetba masü saka lipok nungi Tsüngremi tenteta yutsüba lir. Asenokbo teyanglur Tsüngremi kechi tenteta yutsü aji benschirtem dang lir. Atangji, kibongji Tsüngremer senmang asünung, iba ya keta-sena aser shisakaa achayangtsü tamanger shia mapa lir. Aser iba tesayuba laishiba nungi agütsütsü asoshi arogo nem nunglokjaa lir. Anungji Khristan kibong tajung yangerba nung kija-kibong aser arogo külemi teka amteper inyaktsü nungdaker. Arogo tulu süaka kibongtem tashi meitra iba arogoji yakta dang laotsü. Aji oda, arogo kibong aser kiboktem nung dang temulung agütsüshi nung, arogo tashi itadoker alitsü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Rara ajanga Khristantem aikati Bethlehem yimti toktsür aoeer



Bethlehem yimti anünglen nungi tangokba noksa nung angur.

January 04, 2025: Israel aser Hamas na tsüngda maneni raraba ajanga rongsenkettzüng nung mejungi kongshia Khristantem aikati Bethlehem yimti toktsür odar, ta Bethlehem nung pastor kati metetdaksü.

House of Bread church nung pastor, Fadi Al Zoughbi-i, Bethlehem nung hotel aser nungo osettem ayokba dokan shilem 90 bo shibangogo aser nisung aika kanga sensak tia ia timtemdar, ta metetdaksü.

Tan hopta kija nung Israel-i anünglen nungi amakdang Gaza nung nisung 50 shi tepsetogo.

Pastor Fadi-i, tangbo Bethlehem aser linük tesem ajaklen Khristan nütsüngji shilem 1 dang nungi tajemba lir, ta metetdaksü.

"Onoki iba ya denominations ajak züngoka jembir. Mezüng Korint nung tenyar Paul-i, onoki tayongzükbatem aika ajangshir aser Yihuda nungeri Khrista Kangki nung metabas aser Yihuda nunger masüba nisungtem nüchi masüba indang sayutsüngir, saka Yihuda aser Greek nunger naprongla ta ashirtem dang, Khrista ya Tsüngrem tashi aser Tsüngrem shisatsü ta ashir, kechiyong Tsüngrem sowabaji nisung dang nungibo shisa takaba, aser Tsüngrem tashi maitbaji nisung dang nungibo tashi taitba," ta ashi.

"Khristan nütsüngji shilem 1 dang nungi tajemba, ibayongji onoki timtem aika ajangshir, ajisüaka onoki mapang ajak nung kiyongertem aser tangartem den

yimjung nung alitsü meranger. Iba ama timtem tensa ka nunga onoki maneni Tsüngrem temeim sayur," ta pastor-i ashi.

Pastor Fadi-i, 2023 küm October 7 nü Hamas teloki Israel amakba sülen nungi temeshi ainlen jajaritem aser raliwalirtemi Bethlehem mesemdangba agi Bethlehem nung hotel aser nungo oset ayokba dokantem ajak amai shibangadokogo, ta metetdaksü.

"Rara tenzükba sülen nungi timtem kanga ajurur. Nüngdak balala atema nüburtemi Tsüngrem dang sarasademer. Nisung aika para kidang alir, anungji parnok aikati para magütsüteter mesüra kibong mesütsü atema chiyungtsü mangur. Anungji Arogo wadang ka ama onoki nüburtemi atema maneni sarasademtsür aser Tsüngremi kechi moatsüdir ibaji nüngdakba nisungtem den lemsateper," ta pai metetdaksü.

Tasüngdangba ka langzüdang pastor Fadi-i, "Iba rara ajanga timtem aika ajurua nisung aika teimla samaogo. Nisung aika tetsübu nung alir. Iba dak alia mapa manguba jenjang kanga mejungi kümogo, ibayongji asükwa mongpu nung nisung aikati yimti toktsür oadokogo. Khristan kibong aikati taküüm kümzüka alitsü aser mapa inyaka chiyunga alitsü atema tanga linüktemi aotsü asoshi yimti toktsür oadokogo," ta metetdaksü.

Pastor Fadi-i, par kibongbo Bethlehem nung dang alitsü

kechiyong ibaji par kibong atema Tsüngrem tajaba lir, ta ashi.

"Maneni yimti nung alitsü aser yimti nung anüngzüka alirtem ajungmesotsü aser Tsüngrem temeim parnok den lemsateptsü atema Tsüngremi ozü kibong jatet. Anungji onoki maneni yimjung atema sarasademtsü, rara anentsü atema sarasademtsü aser tensa süngjemtsü atema sarasademtsü," ta pai metetdaksü.

"Iba ya talisa tanurtem atemabo temela masü, kechiyong rara ajanga tetsübu balala tanurtemi tenük agi nguogo. Onoki tanurtem dang, Tsüngremi na meimer, Tsüngremi na kümzükner aser Tsüngremi na moatsüner, ta shia parnok nem Tsüngrem temeim angatetdaksütsü meranger," ta pastor-isa metetdaksü.

Tan hopta Israel-i anünglen nungi Gaza amakba sülen Pastor Fadi-i, "'Siren' ola ajanga ozü kibong anepdang 4:00 ako nung saaka liasü, ajisüaka tamang ajanga onok nem tashi agütsür. Aonung 'siren' aser 'rockets' ola angashitsüji tetsübuttsüka lir saka onoki Tsüngrem dak teimla ayur. Onoki onok kümzüktsü aser yimjung atema sarasademer," ta metetdaksü.

2023 küm December ita nung Israel sorkar indang Central Bureau of Statistics (CBS) ajanga ashiba agi, Israel nung Khristan nütsüng 187,900 shi lir aser ibaji linük nung nütsüng shilem 1.9 dang lir.

ANOGO ABEN TSÜNGREM DEN

TEPELA MULUNGJANGJI MOZÜ TAJUNG

Tepela mulungjangji mozü tajung; saka tanela teraksa jagi teret kongdaksür.

~ Apijemtsü 17:22

Alima nung nisung shia jakla yimya aser liba liro balala angur. Aser item rongnung Lai o nung ashiba ama karbo mozü tajung ama lir. Yamala nisung taküm liba liro angudang memeteti asenoka tangazüktsü aser temoatsü jenti angur.

Item amala nisung dak teti tepela mulungjang tener, kechi tia tensa ajurudir ajuruaka Tsüngrem nem tenüngsang aguja litetba taküm kibongtem lir. Aser parnok dak tangar dak tajung ajitetba tenük, tangar aria bilemba mulungsentsü, tagütsünü mulungjang atenba angur. Asenok aikati zuba toktsüba taküm, rongsen, adianü, medemertem, tamang aser yamala mesük ajak parnokibo Tsüngremer temoatsü ta züngshia, tepela, tesünep, nung anogoshia alir. Tejashi, timtem anogo ajurur saka iba jagi mokbangdakja malir, saka Tsüngrem dak tamang teimla yur tepela mulungjang agi item ajak kokdaksür.

Temeim adianü, tepela molungjang tener tangar asoshi mozü tajung küma züngshitsüsa asenok kija kibong takümi litetdarma? Rongsen, nübu, sempet tenlaba aser shisatsü agi yaritepba itemji dang mapa tajung inyakba ta mezüngshir. Tanü, asenok tepela mulungjang atener agi anünga lir, koba mozü tajungba ta Lai o nung ashir. Anungji, arung tamanger shia iba ama jakla benshia taküm alitsü merangdi ta ayongzüker.

ICC-i 2025 Global Persecution Index report sangdongogo

Washington, January 04 (Agencies): International Christian Concern (ICC)-i 2025 küm indang Global Persecution Index report sangdongogo; iba report nung linük 20 nung tamangba yimsü nung ajemdaker reshikangshiba kuli balala bushitetba aser Khristantemi reshikangshiba otsütem densema lir.

ICC Tir, Jeff King-i, "Alima tesem balala nung reshikangshi tamajungba aliba tesemtem jangjatsü atema ICC-i bushisüngdanga liasü. Alima nung Khristan million 300 dak temai tepuokdak ayuba, shi nung reshikangshiba aser tepsetba densema reshikangshi tapu ajak ajangshir," ta metetdaksü.

2025 Global Persecution Index report ajanga ashiba agi, Nicaragua linük nung Arogo aser Khristantem reshikangshiba jenjang ano tamajungba kümogo; sorkari Khristantem anema inyakba kanga bulua kümogo.

India nung Hindu nationalism atema inyakba kanga bulua akümba ajanga anti-conversion ozüngtem ajanga Khristantem densema minorities temeden anema inyaker aser loktii amakba kanga bulua kümogo, ta report nung shia lir.

Democratic Republic of Congo, Nigeria aser Sahel region tesem ajaklen Khristantem amakba aser Khristantem jenti jenshiba osang

aika lir. Global Persecution Index ajangasa, linük aika nung sorkar ketdangsertemi tashi tali amshiba, nisung jenti jenshiba aser yimsü nung ajemdaker alia inyakba kanga bulua kümogo, ta metetdaksü.

Sorkar aikati Khristantem anema inyaker aser tamangertem mita repringtsü aser aziüktsü atema technology kanga bulua amshir, ta report nung shia lir.

Alima tesem aika nung Khristantem reshikangshiba kanga bulua akümyonga Khrista osangtajung maneni proker aser Tsüngrem yimli maneni ainer, ta report nung shia lir.

ICC-i, "Iba report ya list ka

dang masü saka Arogoi reshikangshi aremba aser alima nung Arogoi mapa inyaktsü atema tayongzüka ola ka lir. Iba Index nung 2024 küm tamangba yimsü temeden anema inyakba linük tamajungtibatem, kiralongrar teloktem aser sorkar lenirtem metetdakja lir," ta metetdaksü.

Alima nung talisa Africa aser Asia na nung Khristantem kanga reshikangshir. North Korea nung Khristantem jail mesüra labor camps nung puoker reshikangshir, tashiyim amshia raksatsür mesüra tepseter.

Africa nung talisa Khristantem reshikangshiba, kiralongra, Islam yimsü alia amangba, yimsü balala tsüngda

rara aser sorkaria reshikangshiba ya tayongzüka tulu lir.

ICC-i, tamangba yimsü temeden dak sendakba ozüngtem tashi itshitsüla, yimsü balala nungi lenirtem ken o jembitsüla, alima linüktem rongshitsüla, yimtenren tashi itdaksütsü atema inyaktsüla aser sensak tia anema inyaktsüla, ta metetdaksü.

ICC ya global ministry ka lir; parnok staffs aser subcontractors 100 shi lir aser iba nungjagi 20 bo US nung toklang tenzükertem lir.

ICC-i alima tesem balala nung reshikangshiba Khristantem atema inyaker aser Khristan nütsüng ajema aliba linüktem nung Arogotem yangertsütsü atema inyaker.

AO OSHI ANGAZÜKDAK:

TANÜ ANGAZÜKTSÜBA OJANG

Tayang

(v)nübutsök, nübo tsüa aliba küptok (return favour)

* Tanübo onok par dang tayang küptoka Moaba'er lui ao.

Tayangtsüung

(n) tesülenba tetsüung, tepi aketba tetsüung (hind leg)

* Ak tayangtsüung anaprongla awazür nem agütsü.



OLONG PAITEP # 7024

Grid for OLONG PAITEP # 7024 with numbers 1-18 in various positions.

TIPLÉN

- 1. Inyaker ajangtetba - (3)
3. Bangsemo adokdak - (5)
6. Shitak mesüi inyak - (7)
7. Ya mimong nung angur - (3)
9. Reprangzük - (4)
10. Tasola - (5)
11. S _____ - (4)
13. Yagi ajak ashioktsür - (3)
15. Ki aokba oset - (7)
17. Ak shi nung inokba tasen - (5)
18. Ishika - (3)

LANGTSÜNGLEN

- 1. Meshidak - (3)
2. Tanaben soshir - (7)
3. Iba anogo - (4)
4. Meshi - (3)
5. Yagi mi tsükloker - (9)
6. Shi tapu ka - (9)
8. Yagi ayimer saka ozü masü - (3)
9. Ajokba shiruru ka - (7)
12. Inyaktet - (4)
14. ____ hi - (3)
16. Akümüli nungi pilar - (3)

OLONG PAITEP # 7023 TELANGZÜBA

TIPLÉN :

- 2. Benja, 4. Tamet,
5. Wabong, 6. Benden,
10. Khuret, 12. Temeim,
14. Semtu, 15. Tenya.

LANGTSÜNGLEN :

- 1. Amo, 3. Jana, 4. Tembar,
5. Wangküm, 7. Dokan,
8. Khu, 9. Petinu, 11. Bere,
13. Ama.

NAI-A YA METETTER MA



Telangana nunger Kranthi Kumar Panikera-i Guinness World Records ka yangluogo. Panikera-i minute ka tsüungda pa temeli ajanga electric fan blades 57 anendaktsüba atema iba otsü tasen yanglua liasü. Panikera ya Suryapet nung alir aser pa dang "drill man" ta ajar.

Tai Ahom nunger ST jenjang meshia lungkak ait



Guwahati, January 4, 2025 (Agencies): Tai Ahom Yuva Parishad Assam (TAYPA) züungsemtemi Guwahati nung Assam Secretariat anasa

nem ST jenjang magütsür. Parnoki mapa meinyakra 2025 ya BJP atema küm tamajung ka asütsü" ta TAYPA President Diganta Tamuli-i ashi.

TAYPA-i lungkak aitba sentong tuluba agütsü tebilemba lir aser iba nung rail, national highway, aser economic blockades densemstsü akok.

Tai Ahom nungeri mapang talangka ST jenjang meshia arur aser sorkar balalai agütsütsü nangzükaka magütsür.

BJP-i iba atema telangzüba kecha magütsü lir saka Assam assembly elections mapang iba ajanga tayongzükba tulu ka ajurutsü akok.

Manipur minister-i IDPs atema ki 15,000 yanglutsü shidang

Imphal, January 4, 2025 (Agencies): Manipur nung internally displaced persons (IDPs) atema ki 15,000 yanglutsü aser iba ya special package ka ama asütsü ta Rural Development and Panchayati Raj Minister, Yumnam Khemchand Singh-i ashi.

items bener aruba nung sen talila endoker anungji ki ka atema Rs 5 lakh agütsütsü ayongzükogo" ta paisa ashi. Ki shia Rs 1.3 lakh endoka ki 7,000 yanglutsü ministry-i agizükogo saka iba yagi mepirir. Ki shia Rs 5 lakh agütsür ki 15,000 yanglutsü mepishiogo, ta

nung nisungtem lidar.

Churachandpur district nung prefabricated houses 400 yanglutsü aliba nungi 240 yangluogo, 160 teyangludak lir aser 150 nung nisungtem lidar. Imphal West nung ki 250 yanglua nisungtem lidar aser Imphal East nung ki 530 yanglutsü aliba nungi 400 renemogo aser 130 teyangludak lir, ta Manipur Home Department-i metetdaksüogo.

Union Minister of Rural Development, Shivraj Singh Chouhan den video conference ajanga senden ka amendang iba tebilemba ya lemsatop.

Union Ministry-i item tebilemstsütem angatetsü imlar. Manipur nung Amrit Sarovar Scheme kanga junga inyakogo. Ita 19 tashi tensa mejungi aruaka Union Ministry-i awatsüung 1,220 yanglutsü latettsüba nungi 1,228 yangluogo, ta pai ashi.

Kangpokpi district nung ki 1,100 yanglutsü aliba nungi 1,050 renemogo, 50 teyangludak lir aser 1,000 nung nisungtem lidar. Thoubal aser Kakching district tem nunga ki noklang anana yangluogo aser nisungtem lidar. Bishnupur district nunga ki 320 yanglua nisungtem lidar ta Home Department-isa ashi.

"Manipur nung 60,000 IDPs tema timtem ajurur anungji Ministry of Rural Development ajanga senotsü aser ki talila lemkütsütsü nungdaker" ta Minister Khemchand Singh-i ashi.

Imphal West, Imphal East, Bishnupur, Thoubal, Jiribam, Noney, Kakching, Churachandpur, aser Kangpokpi district tem nung kibong 2,058 nungi nisung 7,540 tashi jenoka lir.

Ki shia nung nisung 3 nungi 5 alitsü akok saka IDPs teimbaka relief camps nung dang alir. Tesem balala nung nisung 63,538 tashi relief camps nung jenoka lir.

"Ministry of Rural Development-i ki shia Rs 1.3 lakh endoka ki 7000 yanglutsü lemkütsüogogo saka talidak makar nisung 60,000 tema lir. Ki yanglutsü lemkütsüba yagi mepirir anungji onoki ki 15,000 yanglutsü mepishiogo. Manipur ya arrtsülen lir aser tanga state tem dang nungi construction

Manipur sorkari district 7 nung prefabricated houses 3,000 yanglutsü sentong atong. Iba nungi 2,660 yangluogo, 340 teyangludak lir aser ki 2,520

Shillong nung police-i Bangladeshi nunger pezü apu

Shillong, January 4, 2025 (Agencies): Shillong nung police-i Bangladeshi nunger pezü apu, parnok ya ozüung alema India telungi aiterem lir.

angazükba sülen police-i Anjalee Petrol Pump nung par pezü apu.

East Khasi Hills kübok Nongjri village ajanga parnok India telungi ait aser Jammu and Kashmir-i aotsüba sentong liasü ta police-i ashi.

Taitsü aketba nisung kar tourist taxi ka nung lir ta osang

Parnok ya Akhtar Sheikh, Rupa Begum, Raju Ali (60), aser Tajul Islam (27) nunger ta jangjaogo aser tourist taxi (ML05X6502) ka nung liasü.

Police-i par pezüprong pua lir aser parnok ozüung alema aitba bushisüung dang südar.

Guwahati nung nisung 2 ket nung taila sen bena aliba apu



Guwahati, January 4, 2025 (Agencies): Guwahati kübok Jorabat tesem nung nisung ana

Tenaprong ya Meghalaya kübok East Khasi Hills nungi lir aser Assam-Meghalaya arrtsü anasa Jorabat nung apu ta police-i ashi.

Tena ya Bytanlang Kharkhongor aser Jibai Angkya na ta jangjaogo.

FICN shibelenba osang kar angazükba sülen police-i gari ak ka soter mita reprangdang Rs 500 notes indang taila sen bena aliba angu. Tena ket nung taila sen Rs 2 lakh bena liasü.

Israel nunger sepaitemi West Bank nung lanur ka tepset



West Bank kübok Balata camp nung 'Balata camp, crucible of men, bastion of the free' ta zülur aliba jara ka ajanga asangur janu ka süia aoba noksa nung angur.

Nablus, Aenjeti/January 4 (Agencies): Israel military-i West Bank kübok tesem balala asendenshir meita aoba mapang Balata refugee camp nung lanur ka tepsetba den nisung teku yirutsüogo.

Palestinian Ministry of Health-i Honibarnü ashiba agi, amang sangwa-a iba camp meita aoba mapang arishi küm 18 tain Muhammad Medhat Amin Amer khaseta liasü. Iba camp ya occupied West Bank kübok Nablus yimti anasa lir.

Israel nunger sepaitemi Hokolbar aonung nungi tenzüka iba tesem meita aoba mapang nisung teku kanga mejungi yirur lir, ta Palestinian Red Crescent-i metetdaksü.

Palestinian news agency Wafa-i ashiba agi, Israel nunger sepaitem Awarta checkpoint nungi iba camp-i ai aser panoki camp temeket nung aliba kitemi sniper tem yoka liasü.

Israel military-i Honibarnü

ashiba agi, sepaitemi kiralongrartem dak injang khaloktsü, shirnoki sepaitem dak bomb, molotov cocktails aser long aser fireworks khalokja liasü.

2023 küm October 7 nü Hamas puri Israel maka Gaza Strip nung rara tenzüka sülen West Bank nunga azütokshi lendong tali kümogo.

Iba sülen Palestine nunger 815 Israel nunger sepaitem mesüra iba tesem nung aliba Israel nungertemi tepsetogo, ta Ramallah nung amendaker aliba Palestinian Health Ministry-i ashi.

Kasa mapang tsüingda Palestine nungertemia occupied West Bank nung Israel nunger 25 tepsetogo, ta Israel nunger ketdangsurtemi metetdaksü.

Kasa mapang nung Israel nunger sepaitemisa occupied West Bank kübok Hebron temeket nung jila asem tashi

makogo. Local sources temi Wafa dang ashiba agi, Israel nunger sepaitemi Idhna jila nung checkpoint tem amenoker garitem sota identification card tem asadangdar.

Hebron north len ash-Shuyukh nung Israel nunger sepaitemi jila yimtung nung songa aliba Palestine indang wakotem agintsüogo. Tanga meita aoba sentong ka nung sepaitemi refugee camp longbanga liasü.

Kasa mapang nung Palestinian Authority (PA)-ia December ita nungi Jenin refugee camp meita odar. Parnoki ashiba agi, Palestine nunger telungpurtem nokdangtsü atema parnoki iba jenjang agir.

Meita aoba mapang rartep adokogo aser iba mapang civilian aser Palestinian Authority indang security force tem tepseta liasü.

Myanmar military lenirtemi tepuoker meyirejang aika chioktsü

Yangon, Aenjeti/January 4 (Agencies): Myanmar nung military lenirtemi, British nunger yimsüsüba nungi nüjiso ngur linük küm 77 ajungba nüngdem nung bendanger 180 densema tepuoker 5,864 chioktsü, ta state media sangdong ka ajanga metetdaksü.

Military-i Honibrnü ashiba agi, parnoki item tepuokertem ya taochi sayua chiyoktsü tetuyuba agütsüogo aser nisung 144 taküm tepeyong tepuokdaksü ayutsü obendang agütsür aliba küm 15 dang kümtsüogo, ta state meyong MRTV television sangdong ka ajanga metetdaksü.

Tepuokertem ya kechiba puoka ayu iba indang osang aser chioktsü aliba bendangertem ya koba linük nungisa iba indang osang tejangja magütsü.

Associated Press news agency-i ashiba agi, bendangertem rongnung Thailand nunger angopur pezü densema alitsü akok, shirnok taoba küm November ita tatemlen Myanmar indang navy-

i pua liasü. Thailand Ato Kilonseri, par pezü ya nüjiso anguba anogo chioktsü lai imla atar ta metetdaksür liasü.

Myanmar nung mapangshia holiday mesüra Buddhist benjung nüngdem nung tepuoker meyirejang aika chioker. Taoba küm military sorkari linük nüjiso anguba anogo tenüng nung tepuoker 9,000 dak tema chioktsü sangdonga liasü. 2021 kuma October ita sorkari tepuoker aika chiokogo.

Linük nung tepuokdak yua alirtem rongnung lenir aser Nobel laureate Aung San Suu Kyi densema lir. Arishi küm 27 tain lenir ya ken o 14 nung aija küm 27 tepuokdak ayutsü obendang agütsür lir.

Taküm Independence Day ya Myanmar yimtiba Naypyidaw nung amung aser sorkar aser military nungi lenir 500-i shilem agia liasü.

Myanmar indang military tekolakba Senior General Min Aung Hlaing shiba iba sentong

nung maden pa indang speech ya deputy prime minister aser army general, Soe Win-i jembia liasü.

O jembiba mapang pai, telungpurtem dang raratep anener yimden yimsüsüba dak sendakba nung mangatettep alibatem sensaksem ajanga bentettsü ayongzüka liasü. Item telungpurtem ya military sorkar den küm ananbuba rara arudar.

Myanmar ya 2021 küm nungi mepetmesü tulu nung arudar. Military-i civilian sorkar atsüngtokba sülen nüburtemi longkak ait tenzüka aser linük ajunga nung mepetmesü tenzüka liasü. Kasa mapang nung military-i tashiyim amshia nüburtem azüoktsü merangba mapang nisung aika taküm samaogo.

Hopta ana tejakdang Arakan Army-i linük anüolen regional command tongtambang ka atsüngogo. Iba telok yagisa Maungdaw jila atsüngba sülen Bangladesh den arrtsü km 271 azüokogo.

**LAND FOR SALE
DUNCAN BASTI, DMP**

Supply Colony

Nuton Bosti Main road Duncan basti

Nalla

14, 967 sq.ft.

14, 907 sq.ft.

Price : Rs. 1100/- per sq ft. (Negotiable)
Contact : 6009905256

**AFFIDAVIT
SELF DECLARATION**

Pangtisungla wife of JC 551136P Sub Lanuakum HQ/ Coy, 17 Assam Regiment, Pathankot - 91041\7, Punjab, C/o 56 APO, permanant resident of F.A.C Campus Vill. Chuchuyimpang Po. Mokokchung Dist. Mokokcbung 798601 Nagaland. That law producing this affidavit for the purpose of evidence for my wife/ spouse correct name (Aadhar card and Pancard)

Old Name : PANGIT SUNGLAIMS
Correct Name : PANGITSUNGLA

ALI AYOKER

FOOTHILL LEMANG ANASA VIHOKHU NUNG ALI LEPSA-A AYOKER.
TALITSÜ KIMONG ATEMA TAJUNG ANUNGJI TALINUR TEMI IBA NUMBER NUNG CONTACT SÜANG.
SOFT. NUNG 80/- DIRECT CONTACT : 6009530632 / 6009094225

Syria-i FM UAE, Qatar aser Jordan semdangtsü



Asaad Hassan al-Shaibani

Damascus, Aenjeti/January 4 (Agencies): Syria Foreign Minister Asaad Hassan al-Shaibani-i, pai iba hopta tetenzüklen Saudi Arabia semdangba sülen Qatar, United Arab Emirates aser Jordan semdangtsü ta metetdaksüogo

Syria nung sorkar tasen tenteter aliba nung tongtambang lenir yagi Hokolbarnü social media ajanga ashiba agi, linük rongsenketzüng, tamendakdak aser security akangshitsü aser partnership yanglushitsü atema item linüktem ya semdangtsü.

Sorkar tasenba ya al-Assad'er kibong yimsüsüba atsüngtokba telungpur teloktemi tentetba lir aser parnoki linük infrastructure yanglushitsü aser rongsenketzüng ajungkettsü atema Gulf state takar tem nem senotsü intokdaksütsü yongyasetata dar.

Linük asüngsashiba nung Saudi Arabia-i tongtambang shilem agitsü imlar. Iba hopta tetenzüklen al-Shaibani-i anir lenirtem Riyadh-i ao, kong defence minister aser intelligence chief tasenba densema liasü.

Kasa mapang nung King

Salman Humanitarian Aid aser Relief Centre nungi Saudi nunger lenirtem Hokolbarnü Damascus-i oa Syrian Health Minister Maher al-Sharaa den ajurutepa humanitarian aser medical tesendaktep asoshi senaksemogo, ta state news agency SANA-i ashi.

Ahmed al-Sharaa-i aniba sorkar tasenbai linük nung health system asüngsashitsü merangba mapang ka nung Saudi nunger lenirtemi Syria semdangogo. Küm 13 tashi linük nung raraba aser ochimashi inyakyim agi linük health system kanga mejungi raksatsür lir.

Hokolbarnü al-Sharaa aser Lebanese caretaker Ato Kilonser Najib Mikati nati phone ajanga linük ana tsüingda 375km talang arrtsü nung mangatettep adoker aliba bentettsü mulungtepogo. Syria nunger aser Lebanon nunger sepaitem tsüingda mangatettep adoka nisung pongu yiruba sülen iba sensaksem ya agia liasü.

Hayat Tahrir al-Sham (HTS) telok lenir Al-Sharaa-isa, Mikati dang Damascus semdanga sensak asemtsü jaokogo.

Auckland Classic: Naomi Osaka final-i iogo



Naomi Osaka

Aenjeti/January 4, 2025 (Agencies): Taoba mapang world number one asayar Naomi Osaka, 2022 kum sülen Honibarnü mezüngbuba final-i iogo.

Auckland Classic nung semifinal nung lai America tsür unseeded asayar Alycia Parks tsükdakja liasü.

Grand Slam pezü tashi koker alila Japan tsür la yagi semifinal asaya ya 6-4, 6-2 agi kokogo aser iba ajanga la Australian Open metenzük tsüingda la sasadak temulung lemteta kümdaktsüsü, koba Melbourne nung January 12 nü nungi tenezüka asayatsü.

Osaka 2022 kum sülen Honibarnü mezüngbuba semifinal nung asaya liasü. La 2023 kum tanur asoba sülen mapang tatsüka masayai liasü. La kum ka tejakdang asayashi tenezükogo.

Auckland nung taoba asaya asem nungbo Osaka-i kanga temulung lemtetabo masayatet, ajisüaka semifinal nung la kecha arendaka melei kanga junga asayaogo aser la Deobarnü final nung Denmark tsür Clara Tauson den asayatsü.

"Ni iba asayamung nung final tongtetba atema kanga pelar. Ni Melbourne masaya tsüingda hopta ka jelia

asayamung ka nung danga final tonga asaya mali, anungji iba ya kü indang career nung mezüngbuba asütsü," ta Osaka-i ashi, shibai Australian Open anaben benogo aser tang jenjang 57buba nung lir.

"Ni kanga pelar, saka na arishi kum kwi südir süaka tajungba akümtsü atema lenla balala nung renloka aotsü nungdaka dang lir," ta laisa shisem.

Osaka idang tashi aser precision ya jenjang 78buba nung alila Parks atema sashira liasü.

America tsür la ya Hokolbarnü quarter-final asaya tzüinglu aruba ajanga masayatetba sülen Honibarnü asaya ana nung shilem agia liasü.

Osaka-i iba hopta asaya pezü tashi kokogo, ajisüak lai la kübok aliba asayartem dang koka liasü.

Ajisüaka final nungbo la jejang 50buba nung alila Tauson den asayatsü shibai unseeded America tsür Robin Montgomery 6-4, 6-3 agi kokogo.

Honibarnüsa Tauson-i quarter-final nung America tsür top seed Madison Keys 6-4, 7-6 (9/7) agi koka liasü.

Pakistan opener Saim Ayub yirur hopta trok masayatetsü



Aenjeti/January 4, 2025 (Agencies): Pakistan team nungi format ajak nung opener Saim Ayub yiruba sülen taruba ICC Champions Trophy nung masayatetsü.

South Africa den tanabuba Test asayaba mapang pa tetsüing teloktep yiruba sülen pa hopta trok masayatetsü. Pa Cape Town nung tang asaya aliba Test nunga joko ojang dang asayatetsü.

Pakistan Cricket Board (PCB)-i Honibarnü sangdong ka ajanga pa yiruba osang jangjatsüogo. Ayub, MRI aser tanga tetendanga balala agiogo. Doctor temi pa hopta trok anisüingzüksü tetuyuba agütsüogo.

Tanabuba Test mezüngbuba anogo boundary nung fielding amenba mapang pa yirua liasü. "Pa tetsüing tachichilen teloktep raksaogo, koba aneptsü atema hopta trokbo agitsü," ta board ketdangsur kati ashi.

Hopta trok masayatetsüsa

akümba sülen pa iba ita tatemlen West Indies den Test asaya ana asayatsü aliba nung masayatetsü. Pa South Africa aser New Zealand na den February ita tri-series ka asayatsü aliba nunga asayatetsü masayatetsü mejangjai kumogo.

Maneni pa February 19 nü nungi tenezüka Pakistan aser Dubai na nung asayatsü aliba Champions Trophy nunga masayatetsü akok.

Item asayamungtem nung Ayub melena Test asaya nung Imam-ul-Haq aser One Day Internationals nung Fakhar Zaman asayadaktsüsü akok.

Arishi kum 22 tain left-handed batsman ya tawa kanga junga asaya arudar. Pai Australia, Zimbabwe, aser South Africa nung oa asayaba mapang century asem yangluogo, kong Pakistan-i ODI asayamung nung South Africa 3-0 agi akokba mapang century ana yangluba densema lir.

Ind vs Aus: India team temaba jenjang nung lir



Aenjeti/January 4, 2024 (Agencies): Australia den tatembangbuba test nung tanünübuba Rishabh Pant-i run 61 yangluba sülen India run 145 agi tejakdang lir.

India indang tanabuba innings tenezükba sülen Scott Boland-i ball kanga junga ona Australia team jenjang kanga junga kümdaktsür aliba mapang ka nung wicketkeeper-batter ya batting ameni ia pai ball 33 nung run 61 yanglua India team temaba jenjang nung toktsüogo.

Australia team-i mezüngbuba innings nung run 181 dang yanglutetba sülen Boland-i India nunger asayar asem kanga kara out süja liasü.

Australia nunger rongnung debutant Beau Webster-i (57) run timtiba yanglu aser mezüngbuba innings tembangba

sülen India team run pezü agi tejakdang liasü.

Kasa mapang nung India captain Jasprit Bumrah, temang nung timtem adokba sülen ground toktsür ao aser iba sülen temang asadangsü anir oa liasü. Ajisüaka pa anogo tatem tashi nungbo ground-i meyipa arur liasü.

Boland-i out sütsür rongnung Virat Kohli-a densema liasü. Iba asaya nung Kohli-i run 6 dang yanglutet aser India team-i anogo tembangba tashi nung asayar 6 out sür run 141 yanglur liasü.

Steve Smith-i slip nung Kohli kanga junga out sütsüba sülen Pant ai aser iba sülen pai Boland-i aonba ball ka long-on boundary leni six ka züktok.

Yashasvi Jaiswal-i Mitchell Starc indang mezüngbuba over

nung run 16 yangluba sülen Pant-ia pa indang bowling nung six ana atonga azük aser ball 29 nungdang run 50 yanglua liasü, koba pai India nunger rongnungi Test asaya nung half century takaratiba yanglur aliba ball ka agi dang talikla liasü. Pai Sri Lanka den asayaba mapang 2022 kum ball 28 nung half century ka yanglua liasü.

Ajisüaka Pant-a mapang tatsüka dang lir out süatok aser anogo tembangba mapang tashi nung Ravindra Jadeja aser Washington Sundar na batting mena liasü.

Tasemnübuba Bumrah batting amentsü mamentsü mejangja, ajisüaka Border-Gavaskar Trophy takoker bendangtsü atema mapang aika anunga lir. Iba asayamung nung Australia 2-1 agi tejakdang lir.

Poland aser US na United Cup final asayatsü

Aenjeti/January 4, 2025 (Agencies): Sydney nung Honibarnü pei tata semifinal asaya akokba sülen Deobarnü Poland aser United States na mixed-team United Cup final asayatsü.

Iga Swiatek-i straight sets nung Elena Rybakina koka lar team-i Kazakhstan akok aser kasa mapang nung US-i 2-0 agi Czech Republic madak takok ngua liasü.

US aser Czech Republic na semifinal asaya nung tetsür kija asaya nung Coco Gauff-i 6-1 6-4 agi Karolina Muchova akok aser iba sülen tebur kija asayaba mapang Czech nung asayar Tomas Machac asaya tom nung masayatetsüsa kuma Taylor Fritz-i iba asaya 7-6 (7-4) 5-6 agi koka liasü.

"Pai ashiba agi pa asaya ishika timtema liasü, saka nibo merprangtet," ta Fritz-i ashi, shiba-i match points ana tashi ajangeta Machac indang serve ka break asüba sülen tanabuba set akoktsü atema serve süa liasü.

BILEMDANGANG

"Sentilongjia memeyuibo koda perangtsü."

"Pa kanga junga arakzua asaya liasü, saka pa timtema asaya liasü asütsü.

"Idaki kanga dang tatsük. Ni tanabuba set koka tasembuba set asayara pa molatsü atu tenezüktsü akok ta bilema liasü. Idaki asayatsü temela masü aser küna asaya ya physical asaya ka liasü.

Semifinal nung world number two Swiatek-i 7-6 (7-5) 6-4 agi Rybakina akokba sülen Poland 2-0 agi tejakdang aküm.

Poland nunger asayar Hubert Hurkacz-i tebur kija asaya nung 6-3 6-2 agi Alexander Shevchenko koka liasü.

"Iba asaya akokba atema ni kanga nemadangdaktsüogo. Iba asayamung ya Australian Open atema tetemsü terenemshiba ka lir," ta Swiatek-i ashi.

Swiatek-i kasa hardcourt surface nung US Open bo kokogo ajisüaka tang tashi nung Australian Open nung semifinal adena asayadanga mali. Lai tanungba Grand Slam title pezü ya French Open nung koka lir.